

摘藻堂四庫全書薈要

史部

欽定四庫全書叢要

史部

硃批諭旨卷四十五上

詳校官編修臣繆晉

欽定四庫全書薈要卷七千九百三十六

史部

硃批諭旨卷四十五上

硃批沈廷正奏摺

雍正二年十二月二十五日河南開歸河道臣沈廷正謹

奏為遵

旨回奏事雍正二年十二月十八日撫臣田文鏡傳臣

至署捧出



硃批諭旨開讀臣隨即叩頭謝

恩伏念臣一介庸愚荷蒙

國恩服官二十餘載及恭逢

皇上龍飛御極兩歲之內四蒙

特旨遷擢洵歷道員臣屢膺

異數感深無地日夜冰兢正懼稍有隕越以致上負

聖恩乃復蒙

諭旨特頒諄諄訓誨惟恐臣有請託瞻顧不與撫臣同

心料理致壞地方吏治且責臣來豫時有不願之意臣伏思臣與撫臣田文鏡素未同官亦未會面但臣於在陝時原曾聞人傳說田文鏡待屬員過嚴及臣至豫數月見撫臣田文鏡竭忠辦事實心為

國至於整飭官方亦屬職分所宜是以臣甚心服地方公事臣必請撫臣之訓示撫臣亦必與臣商酌甚是和衷臣始知昔日所聞盡屬浮言惟我

皇上乾衷獨斷不惑羣言知人善任實千古帝王之所
未有也茲臣欽奉

訓諭惟有益加黽勉屏絕瞻顧與撫臣同心一德料理
地方以圖上報

聖恩於萬一耳緣奉

上諭令臣回奏交與撫臣田文鏡轉達謹此繕摺據實
回

奏伏乞

皇上睿鑒謹

奏

朕為汝主田文鏡係汝上官但能同心一德他處無可顧慮也君臣大義千古名節須要見透守定時刻勿忘汝姪沈竹觀其行為將來必至不保首領

雍正三年正月二十一日河南開歸河道臣沈廷
正謹

奏為恭蒙

聖訓謹瀝下情仰祈

睿鑒事雍正三年正月十七日撫臣田文鏡傳臣至署
捧出臣前奏摺子奉有

硃批臣伏讀再三仰蒙

天語煌煌提撕備至欽遵之下不勝感激涕零伏念臣
數十年來仰沐

皇上逾格深恩臣之身實

皇上豢養之身臣之官實

皇上簡畀之官臣之居心行事無一不為

皇上所周知而洞鑒非若疎逖之人

天高聽遠必藉他人援引提拔也今臣既受

皇上如此恩遇倘尚欲於他處鑽營是何異舍榮求辱

舍生求死雖至愚之人亦不出此况臣夙邀

惟貴實行不在空言若明為誠信而暗涉欺隱日久終

主恩粗知大義千古名節時時凜惕寧敢頃刻有忘今

露罪更難恕也

聖訓下頒臣惟有朝夕捧誦益加惕厲以期仰報

聖慈於萬一耳臣姪沈竹一介微末亦蒙

皇上訓詞下及臣不勝悚惶祇緣未奉宣示

諭旨是以臣不敢冒昧轉宣惟有作字訓誡示以大義
教以名節務期小心謹慎以報

主恩但臣姪沈竹自幼失教臣時以為慮今在陝西臣
又遠隔不能親為管束倘蒙

皇上憐念仍令回京辦理本旗叅領事務使其學習官
方則臣實舉家頂戴

皇恩於無疆矣為此繕摺敬交撫臣田文鏡轉達所有
奉到

硃批理合恭繳謹

奏

汝姪沈竹豈但不能小心謹慎前次甫經批諭汝摺而
其所行殺身之事業已敗露矣

雍正三年二月二十二日河南開歸河道臣沈廷

正謹

奏為恭蒙

聖訓謹再披瀝下忱仰祈

睿鑒事雍正三年二月十七日撫臣田文鏡傳臣至署
捧出臣前奏謹瀝下情仰祈

睿鑒一摺奉有

硃批臣自分何人乃蒙

皇上逾格提撕既鑒臣愚誠復誠臣欺飾委曲

訓誨至於此極祇遵之下感激涕零臣姪沈竹身受

皇恩罔知報效行事乖違有干

國憲果不出

聖明洞鑒臣因外任年久有此親姪未能教誨蒙我
皇上不加臣重譴預

示先幾雖家人父子何以逾此臣躬沐

殊恩沁肌入髓惟有捐糜頂踵矢竭駑駘以期仰報
聖恩於萬一耳為此繕摺具

奏所有原奉

硃批理合恭繳謹

奏

不但爾為其叔不能化誨朕昔在藩邸時何言不加訓
誠無如竟不遵承惟利是圖即性命有所不顧朕因深
悉其行為故於即位後又復諄諄嚴飭縱內不悛改外
亦當懼王章國法不致仍蹈前轍何乃毫無忌憚又作
如此等事尚容留於天地之間可乎誠所謂下愚不移
之流可憐真孽障也

雍正三年五月二十四日河南開歸河道臣沈廷
正謹

奏為恭蒙

聖諭微臣慚感難名謹具摺奏謝

天恩事竊臣因河南漕船在直隸內黃縣之草坡等處
地方被淺阻滯自草坡而下尚有河南之湯陰縣
地方三十餘里河路亦俱淤淺臣隨親赴督率地
方官建壩催趲由草坡陸續過淺於本年五月十

二日將漕船盡行催出豫境臣於十八日回至省

城蒙撫臣田文鏡傳臣至署捧出

皇上硃批臣奏摺臣當即叩頭祇領伏讀再四不禁感

激涕零竊念臣姪沈竹性情貪鄙行事乖違乃蒙

皇上先於藩邸時每事必加教訓及登

大寶又屢行嚴飭寬以導之威以懾之蓋欲生全成就

之

聖心不啻如父師之於子弟此誠亘古未有之遭逢臣

姪沈竹自應洗心滌慮痛改前非力圖報效以期
無負

聖恩詎意臣姪沈竹心同畜類蠢然無知既不能悛改
於外復不能恐懼於內今又作如此等事以自取
重罪此誠如

聖諭所謂下愚不移者也但臣身係親叔不能教誨臣
姪罪實難逭今蒙

皇上宥臣失教之罪

恩賜訓諭臣祇承之下既深感激復切悚惶所恨才短
識庸未知如何圖報始可仰酬

高厚之恩於萬一耳為此繕摺叩謝

天恩并繳

硃批謹

奏

無庸悚惶爾効力之處朕皆鑒悉加勉以圖上進可也

雍正四年五月三十日福建布政使臣沈廷正謹

奏為恭謝

天恩事竊臣一介庸愚荷蒙

皇上格外洪慈於雍正三年十二月內由開歸河道擢
為河南按察使到任未幾又蒙

皇上特旨授為福建布政使

命臣赴京

陛見後再赴新任臣聞

命自天感激無地隨即起程於雍正四年五月初二日

瞻仰

天顏荷蒙

溫語顧問屢次

賞臣克食初三日又

賜紫金錠藥扇墜諸珍物初七日又蒙

皇上召見指示教訓備極周詳

賜給

上諭一道朋黨論一道

御製詩一幅金扇茶葉等件

命臣由河南一路前赴福建布政使新任又蒙

皇上鑒臣愚誠令臣凡有陳奏之事繕摺交怡親王轉
達伏念臣以樗櫟之材仰蒙

聖主屢次超擢已覺捐糜難報今復受此種種
異數實為格外

曠典感激涕零筆難陳繪臣自

陞辭後即赴吏部領憑起程於五月二十六日到河南

省城遵將

皇上諭旨宣示撫臣田文鏡臣於五月三十日自河南起程前赴福建除有應奏之事遵

旨陸續繕摺交與怡親王轉達上請

聖裁外所有微臣銜感蟻忱理合具摺奏謝

天恩謹

奏

知道了從來受恩易報德難勉之觀毛文銓在閩甚覺

不妥據實奏聞

同日又

奏為敬陳管見仰祈

睿鑒事竊臣荷蒙

聖主持達之知超擢今職隨蒙

恩諭令臣有應奏之事具摺奏

聞臣欽承之下感深五內苟有一得之愚安敢隱默不

言以負

皇上顧問至意今將臣在河南深知有可以裨益於國計民生之事謹為我

皇上陳之一豫省臨河州縣應以黃河為界分管南北以便巡防一豫省附近兌漕水次之沿河地方應預為積貯倉糧以濟漕運一丁銀俱應按地派徵以廣

皇仁以上三條是否可採伏乞

皇上垂覽鑒擇施行謹

奏

所奏三條俱好已發部議矣

雍正四年九月二十九日福建布政使臣沈廷正

謹

奏為奏

聞事竊臣於本年八月初二日到福建布政使任所有

臣衙門經管通省一切錢糧倉穀等項經臣詳明
督撫現在委官分路盤查容俟查明照例具詳督

撫

題報外至查臣衙門歷來陋規每年約收各屬致送
節禮壽禮等銀一萬餘兩又各屬解司起運錢糧
每正銀一兩外加銀二分以為總督巡撫布政司
鹽菜養廉之用通省每年額徵起運正銀一百二
萬六千九百七十七兩零共該收鹽菜養廉銀二
萬五百餘兩但此項銀兩係隨正解收每年各屬
正項錢糧歲內不能如數全完故鹽菜養廉一項

每年約止收銀一萬五六千兩不等內除送給督撫銀各四千餘兩其下剩銀六千餘兩留為布政司鹽菜養廉今臣到任將各屬致送節禮壽禮等項俱皆禁革惟止存鹽菜養廉一項不敢遽革合謹繕摺奏

聞伏祈

皇上睿鑒謹

奏

類此等奏朕槩付之不覽但務實行自能鑒悉何待汝
之陳奏耶

同日又

奏為恭謝

天恩事竊臣前奏敬陳管見仰祈

睿鑒一摺奉到

硃批伏念臣所條奏原屬管窺蠡測恐不足以當

聖明採擇今蒙

硃批獎許發部議奏此誠格外

天恩臣感難言喻惟有殫竭駑駘實心報效以期仰副
皇上獎許鼓舞之

聖心已耳所有奉到

硃批一併齎繳謹

奏

知道了朕之褒獎寵眷不可恃惟信己之居心行事則
百無一失也

同日又

奏為奏

聞事竊臣查得本年八月初七八九等日閩屬地方連日大雨有福州府屬之侯官古田連江羅源等縣福寧州屬之寧德縣俱被水淹浸當據各地方官申報隨經臣將情形一面詳請督撫

題報在案今臣委官細查惟連江縣受災稍重所有被災窮民業經督撫撥發銀穀賑救現已安寧其

餘各縣雖經被水但水勢隨長隨消惟有沿河低
陷處田禾稍減分數其高阜田禾並無損傷現俱
豐茂至查今年閩省地方早禾收成豐稔是以各
處米價自八月至今日漸平減又查各屬晚穀豐
茂異常民間咸稱收成俱在十分以上今已時屆
九月轉瞬十月即可收穫將來晚穀登場米價自
必更減誠恐地方民食上廛

宸衷理合將閩省田禾豐茂米價平減情形據實奏

聞謹

奏

總賴爾等地方大員實心敷政有以感召

天和方可獲豐登之慶也朕曾言高其倬一入閩界必有一番維新氣象今果然矣試觀

天人交感之理昭然不爽於此若仍信不及非庸愚而何勉之

同日又

奏為恭謝

天恩事竊臣於本年八月十七日接到部文知陝西巡撫圖理琛以臣先在延安府知府任內因會審汪元仕虧空一案限滿將周涌收貯西安府庫銀兩擅那代完等語具疏

題叅致奉部議革職乃荷

皇上格外弘慈

特賜恩旨沈廷正在豫省開歸道按察使任內聲名俱

好從前此案乃畏懼年羹堯勢力逼勒所致並非伊之本意沈廷正著從寬免革職欽此臣隨恭設香案望

闕叩頭謝

恩伏思臣被叅之案罪實難辭乃蒙

皇上聖明洞鑒

特賜矜全免臣革職此實從來罕覩之

洪恩而臣獨身承如此

殊遇跪聆之下感激涕零即肝腦塗地亦難仰報
高深於萬一惟有益加惕厲勉盡匪躬之節以期上副
我

皇上鑒拔之深恩而已所有微臣銜感下忱謹繕摺恭
謝

天恩伏乞

皇上睿鑒謹

奏

類斯等事亦止可邀恩一次亟當深自愧悔若視此以
為無妨因而倚恃恩寵放膽肆志殊非將來之福也勉
之慎之

同日又

奏為恭謝

天恩事竊臣於本年五月初七日蒙

皇上召見面奉降與河南巡撫田文鏡

諭旨并

御賜田文鏡鼻烟壺荷包

命臣前赴河南宣給田文鏡臣恭奉

諭旨隨即就道於五月二十六日到河南恭傳

諭旨并將

御賜物件恭交田文鏡外臣隨將宣給過緣由具摺奏
聞今蒙

皇上將臣原摺發回臣敬謹啓封伏閱臣原摺內蒙
皇上將臣向撫臣田文鏡宣述

諭旨內用

硃筆抹去七句仰荷

聖恩特賜

硃批內有錯記者已改發與田文鏡矣欽此竊念臣一
介庸陋仰蒙

聖主事事優容屢加

訓勵今將面奉

皇上所降河南巡撫田文鏡

諭旨不能記憶錯悞傳宣昏昧之罪實所難追乃蒙
皇上不加譴責且復蒙

批諭使臣知所警惕臣跪讀之下既深感激更切悚惶
嗣後惟有敬遵

皇上批飭時加佩誦夙夜冰兢以期無負我
皇上天高地厚之隆恩於萬一耳謹此繕摺奏謝
天恩並將奉到

硃批一併恭繳謹

奏

殿陛之間面聆諭旨傳述一無差謬原屬難事諸如此等不及之過朕自諒汝也

同日又

奏為微臣奉到

硃批謹據實回奏仰祈

睿鑒事竊臣欽遵

皇上硃批訪查得福建撫臣毛文銓自到閩省先因不

諳地方情形或將窮民有拖欠地主租穀者通飭
地方官照依徵比錢糧之例勒限拘追以致窮民
不無嗟怨或將貪暴不法之官如興泉道陶範延
平府知府張道沛不行糾叅反令陶範仍管鹽務
令張道沛兼管海關事務而引為肘腋信用之人
以致官民多有不服又查有沿海向係地方官給
照稽查之商船毛文銓聽信張道沛言語止令海
關給照不令地方官稽查以致商船出入海洋無

可稽考又有章二杜四等係毛文銓管堂家人欺瞞伊主結連衙役孟愛等在省城開設銀號米舖又令門子陳瑞等前赴光澤縣一帶行鹽覓利遂致百姓有巡撫愛錢與民爭利之謠後經毛文銓覺察將陳瑞革役不許行鹽銀號米舖亦已停止又有各屬倉穀毛文銓止據各屬報到之冊籍為憑並不細加盤查以致多有未清此等行為誠如聖明洞鑒實屬不妥但此俱係毛文銓初到閩省所行

之事自臣到任之後細看毛文銓為人尚屬忠厚而辦事亦甚勤謹凡有從前所行與地方不甚相宜之事現與督臣高其倬和衷商酌逐一更正以故數月以來官民俱各相安再查本年五月十一日百姓至巡撫衙門嚷鬧一事緣彼時省城米少價昂百姓見南臺客米八船欲販往興化府糶賣百姓阻住不容開船毛文銓以興化地方需米甚急客販不可阻滯令閩縣知縣前往曉諭該縣不

善開導勸諭以致擁進省城齊至巡撫衙門嚷鬧
直至毛文銓親自出堂明白曉諭復將嚷鬧者查
拏十餘人當即責懲百姓始認罪散去至今人皆
傳說實係百姓刁頑等語此皆臣到閩所見所聞
之事合謹據實奏

聞至撫臣毛文銓此後行事如果有未妥之處容臣再
行具

奏斷不敢稍有隱諱以負我

皇上垂問至意所有原奉

硃批一併恭繳謹

奏

知道了毛文銓行為若此即其屬不妥汝意必如何方謂為不妥耶

雍正五年正月初七日福建布政使臣沈廷正謹奏為

聖恩愈重慚感益深謹具摺奏

謝恭繳

硃批事竊臣因前任陝西巡撫圖理琛

題叅臣在延安府知府任內會審汪元仕虧空一案
部議革職仰蒙

皇上格外矜全從寬免臣革職臣隨具摺恭謝
天恩今蒙

皇上將臣摺發回臣叩頭啟封敬閱

硃批諭旨伏念此案荷蒙

聖主寬宥已屬格外

殊恩今復荷

殊批提撕警覺曲加訓勉雖家人父子亦從未有如此
之諄切教誨臣跪誦之下感激涕零愧悔無地嗣
後惟有凜奉

諭旨朝夕警省每事愈加小心謹慎以期無負我
皇上成全訓誡之深恩耳謹此繕摺恭謝

天恩併繳

硃批謹

奏

朕用天下羣才素非謀面止據羣工之薦揚糾劾尚欲甄別淑慝黜陟幽明况藩邸有數幾人皆向所稔悉苟有一長可取者豈肯不拔擢任用以示勸其言行乖違怙終不悛者何容不譴責棄逐以示懲若一任倚恃私恩干犯法紀在汝等喪失天良自招罪戾此其小者天下後世將謂朕為何如主耶如傅鼐博爾多朕何嘗不

期望成一人物其奈小人福淺何此二人即係汝等榜
樣惟自信無他方保始終盡善試思於朕前能陷害人
者為誰能援庇救濟人者為誰朕之耳目心思匪可箠
鼓搖惑也努力實行做一好官成一好人以報效國家
垂名史冊顧不美歟較之眼前浮榮小利奚啻徑庭勉
之勉之毋辜朕望

同日又

奏為恭謝

天恩事竊臣前因陳奏河南事宜三條仰荷

皇上洪恩特敕部議臣隨繕摺恭謝

天恩今蒙

皇上將臣原摺發回臣叩頭啟封敬閱奉有

硃批仰見我

皇上教育恩深無微不至以居心行事勗臣俾臣時加

省察駑鈍如臣猶蒙

皇上訓示諄諄有加無已臣跪誦之下感深肌髓莫能

名狀惟有敬謹服膺朝夕惕厲以期無負我

皇上天高地厚之洪恩已耳為此具摺恭謝

天恩併繳

硃批謹

奏

覽奏已悉奮勉實行加謹加慎方克有終

雍正五年閏三月二十一日福建布政使臣沈廷

正謹

奏為恭謝

天恩事竊臣因前任陝西延安府知府任內會審汪元
仕虧空一案部議革職仰蒙

皇上格外洪恩從寬免臣革職復荷

硃批諄諄訓勉臣隨繕摺奏謝

聖恩今蒙

皇上將臣原摺發回臣叩頭敬閱奉有

硃批伏念臣一介庸材仰蒙

皇上數十年養之恩洵授今職頻荷

聖諭誨勉有加無已茲復蒙

皇上硃批訓誡諄切周詳既示臣以榜樣更示臣以他人不能陷害勉臣作一好官報答

國恩提撕警覺期望彌殷臣跪誦之下不勝感激涕零嗣後惟有凜遵

聖訓勉力實行始終永兢恪盡臣職以期仰副我

皇上教誡之深恩已耳為此繕摺恭謝

天恩并將原奉

硃批恭繳謹

奏

一切訓諭只在能行與否不宜惟以章奏為務若不實心實力信奉遵行將來至噬臍不及時悔何及也

同日又

奏為恭謝

天恩事竊臣前因陳奏河南事宜三條蒙

皇上特敕部議臣隨繕摺奏謝

天恩仰荷

硃批令臣只信自己居心行事諄諄

訓勉臣復繕摺奏

謝茲蒙

皇上將臣原摺發回臣即叩頭敬閱奉有

硃批仰見我

皇上恩同覆載訓誨維殷臣惟有恪遵

聖訓加謹加慎期保克終以上報

聖主垂誠之深恩於萬一耳謹此繕摺恭謝

天恩併繳

硃批謹

奏

能於朕諭誠信一分則受福一分能加勉敬慎則祿位
悠久此亦自然之理但地方上一切吏治民風雨暘年
歲何故一字不及數千里之遙僕僕道路止齋呈一篇

閒話將欲借奏摺聲勢以挾制督撫恐嚇同寅誇示屬員耶徒滋勞費於事何益之有閩省如無可上聞事件似此毫無益於用人行政之奏嗣後不必

雍正五年四月十六日福建布政使臣沈廷正謹
奏為據實奏

聞伏祈

聖鑒事竊臣自抵任後訪得閩省府廳州縣各官向來因循瞻顧怠玩廢弛倉庫多有虧缺督臣高其倬

深知陋弊令臣詳委專員將各屬倉庫徹底盤查
臣即詳明督撫將各府廳州及附郭首縣俱委道
員盤查以專責成其餘各縣悉委別府屬縣分盤
以杜同府之瞻徇今催據各委員送到盤查倉穀
冊結臣查閩省官民捐積監穀通共一百八十二
萬四千二百二十二石零內除征臺軍需并連江
縣水災豁免以及叅追虧空等項外其餘各屬貯
倉之穀據稱有歷年發糶尚未買補並前任流交

現存穀價者有碾米給兵尚未徵補者有歷任流
交民欠及發價採買未補者現在實貯之穀合之
原額數目未及其半此倉儲之所以有名無實也
查平糶一項原因青黃不接暫濟民食當秋收之
時自應照數買補無如各屬任意延緩並不買補
槩存價銀今臣已詳明解貯司庫以杜虧空俟秋
收時發還買補又碾米給兵一項查兵米原係地
方官徵收支放祇緣青黃不接之時民間輸納不

前兵食又難緩待是以從前

題定每年春夏二季兵米暫借倉穀碾給該地方官自應於秋收後照數徵補乃借後任民拖欠以致歷年多有未清臣因係糧道專司一面移道嚴查一面分檄各屬飭令照數徵補倘有以完作欠立即揭報督撫叅追又流交穀價一項乃係歷任各州縣交代之時倉貯缺額遂折價移交以副交盤之限每石價銀自三錢八分至四錢四五分不等

近年穀價稍貴不足買補是價雖實貯穀已虛懸
更有流交民欠一項據稱發價採買尚未交倉但
歷任相沿漫不催交以致僅存空領穀無實貯以
上各項前於三年

奏報案內俱皆捏造實貯此番盤查務期徹底清楚
飭令各屬據實具結在各道府多有仍照往年一
槩出具實貯印結臣詳明駁換各屬觀望延挨稽
誤時日而限期迫屆臣隨將各道府報到穀數彙

造草冊呈送督撫復核經署撫臣毛文銓將臣草冊內兩次粘簽令臣將三年捏報實貯穀數改作四年平糶臣查三年捏報實貯穀數一切流交民欠未買等項俱各包藏在內今若改作四年平糶固可符三年捏報實貯之數然臣何敢改移年分以自蹈欺罔之罪隨向毛文銓再四婉稟不便改造在毛文銓以臣為行事刻薄過於膠執即各屬亦俱恐罹三年捏報之重譴怨恨更甚今各知府

自知三年捏報實貯之穀不能掩飾隨俱陸續具報買補臣以各屬盤查後續報買補米穀必須委員盤驗明確方可入冊而毛文銓云各屬報買米穀一面委員盤查一面只管造冊限期已逾不能久待如查有不足隨後亦可

題叅等語臣只得詳明入冊惟漳州一府因該知府耿國祚與汀漳道劉燦彼此互揭所以漳州一府十縣之倉穀有無虧空實難懸定應俟糧道李玉

鉉盤明回日方知確實臣已將情由詳明督撫俟
盤查明白後另行造報不敢彙冊詳送其餘各屬
倉穀屢據福州府知府胡承謀向臣稟稱總督意
在保全屬員將流交并三年捏報穀石司冊內不
妨改作四年平糶只須我們經營各府縣將現在
平糶江浙米穀糶少報多既可歸還價銀又可買
穀補倉將來亦無後患一轉移間不特巡撫可符
三年

奏報之數而各屬亦可免三年捏報實貯重譴且閩
省歷年未清倉穀經總督此番盤查之後再待兩
三月俱可實在盡成實貯將此美名歸於總督此
事我們共同商議已就等語臣思知府胡承謀所
言若出於毛文銓之意情或有之高其倬必無此
意臣於到任後高其倬屢與臣言倉穀一事務要
據實造報不可稍有徇隱且我們兩人亦賠不起
即巡撫有三年

奏報案内捏造實貯之數亦不能代為掩飾語言何等嚴切豈有令各府縣糶少報多巧圖彌補之理至於毛文銓一聞臣據實造冊之言遂怒形辭色必欲將各屬未補流交民欠等項盡造實貯方合其意是以各府縣結成黨羽與巡撫通同一氣紛紛具報買補將完何從前艱於採買而此時一旦買補如此之易欺朦掩飾情弊顯然臣雖立刻委員盤驗查取倉收奈所委之員不過係閩省各官

伊等暗相聯絡百計扶捏虛實殊難憑信臣思倉穀頗易盤查尚有如許掩飾而錢糧之那新掩舊以完作欠并已徵在官溢額銀兩侵隱不報混淆更甚容臣確查另摺奏

聞外臣目擊情形寧受巡撫與屬員之怨恨不敢稍有瞻顧隱瞞謹據實繕摺上陳

聖聰伏候

皇上睿裁謹

奏

朕原謂毛文銓不妥高其倬亦慮其偏於善柔爾此奏甚屬可嘉但恐擇善不固言行不能相符倘亦被誘入其中通同欺隱料常賚到時必不肯隱默縱令常賚仍復追隨步趨現有直隸江西湖北榜樣朕既知其不妥自當逐漸清理到爾閩省彼時爾等身家性命干係較之巡撫各屬之忌恨試思孰輕孰重耶秉公正色勉力為之負君悞國之咎斷不可蹈宵小之怨憾何足介意

汝自處於不敗之地他人其如汝何坦懷勿慮可也

雍正五年七月初三日福建布政使臣沈廷正謹
奏為敬陳倉穀造冊原委仰祈

睿鑒事竊臣前因察盤閩省各屬倉穀已將一切情節
繕摺奏

聞外嗣緣漳州一府并所屬十縣倉穀查有虧缺未清
必須盤查明白臣方可造冊詳送而署撫臣毛文
銓令臣止照知府耿國祚造報實貯之穀彙入冊

內臣再四不敢依從又汀漳道劉燦先因揭報耿國祚虧空未肯出結及到省數日旋即出結而出結之後又因耿國祚造送冊結不符復具文通詳云被耿國祚哄騙出結等情署撫臣毛文銓無可如何只得將閏三月內劉燦與耿國祚互揭虧空勒索各情由於六月初六日具疏

題叅在案所有漳州一府十縣倉穀隨經毛文銓批令臣不必彙造而總督臣高其倬又批令臣止將

漳州府并龍溪縣二處扣出其餘漳屬九縣仍令
造冊此外各府屬縣凡雍正三年捏報實貯之穀
或已經買補或現在存價無論多寡臣自應據實
開造無如毛文銓見冊內造有存價字樣者即為
不悅適於六月二十三日臣接到署撫牌文內開
係蒙

皇上所降署巡撫毛文銓

訓旨并将福州府知府胡承謀革職即速進京等因欽

遵轉行到臣臣隨將盤察倉穀一案據實造冊於
六月二十六日詳送自送冊之後毛文銓諸事吹
求臣惟有順受至臣此番所造察盤倉穀清冊俱
係據實開造凡買補穀石年月備細註明是以與
往年冊式不同臣謹將造冊緣由繕摺奏

聞謹

奏

知道了易云臣不密則失身前次之奏併今此所奏俱

當固密為要稍露則禍即隨之矣

同日又

奏為據實奏

聞事竊照閩省察盤倉穀一案臣已將各屬情形并造冊稽遲緣由於本年四月十六日繕摺奏達

聖聰外今臣檢查雍正二三年察盤倉穀底冊有泉州府屬之晉江南安永春三縣漳州府屬之龍溪漳浦南靖龍巖四縣俱開有被水發糶穀石查雍

正二年泉漳二府曾報被水並不成災惟龍溪南靖二縣倉穀淹濕具有報案至晉江南安永春漳浦南靖龍巖等縣因流交穀價僅有四五錢不等不敷買補是以捏作被水發糶並無報案今值察盤之際臣日事督催除永春漳浦南靖龍巖四縣已於雍正三年買補外其南安晉江龍溪三縣近據該府縣具報將存貯穀價俱照數買穀補倉并送倉收在案又原任泉州府叅革知府王道成攝

理晉江縣事任內虧空穀價銀九百七十三兩未
經完補接任知縣葉祖烈屢次通詳並不著落究
追竟聽王道成請咨歸旗葉祖烈以穀價無著不
得已請將耗羨銀內抵補經毛文銓批允今於盤
查之時始據葉祖烈照數買補又原任汀州府叅
革知府吳澍虧空未補穀三萬九千三百七十八
石零存價銀二萬九千六百六十四兩零經前任
總督滿保

題明發給邵武建寧二府買穀補倉嗣於雍正三年復經總督滿保會同巡撫黃國材

題報邵武建寧二府除將前項穀石買補全完外又多買穀石剩有贏餘銀兩請將採買各官議敘經部議奉

旨准將府縣各官議敘在案臣查此項穀石當日

題請議敘之時惟建寧府買足貯倉而邵武府屬之邵武縣光澤縣俱尚有民欠倉穀未交前任督撫

遽以照數買足

題報府縣各官遂邀議敘今委員盤查之後始據光澤縣報收全完出具倉收到司而邵武縣尚有未買穀八百一十石價貯府庫臣屢檄嚴催始據邵武府以價貯府庫現今買收府倉等語申覆以上三案雖據該府縣俱已照數報買但臣既經查出除察盤冊內登明外理合據實奏

聞謹

奏

前此之虧缺果能實補足數則可以已但恐所報者尚未必實貯在倉也諸凡弊端統俟欽差到時備悉言之

同日又

奏為奏

聞事竊臣於上年八月到任後查得泉州府屬之南安縣參革知縣黃廷鑑虧空案內有康熙五十六年起至雍正二年止民欠地丁銀三萬五千餘兩接

任知縣湯啟聲知民欠不實在於櫃書家內搜出
空白印串情弊顯然是以湯啟聲不肯出具認徵
民欠印結具文詳報臣隨於上年九月內轉詳督
撫

題明奉

旨嚴提詳審追擬茲據泉州府知府張無咎申報南安
縣知縣沈榷會同晉江縣知縣葉祖烈暨署泉州
府通判王仁詳稱審據南安縣管糧經承陳新供

出現任福州府理事同知時惟豫於康熙五十九年間在前任泉州府海防同知任內第二次署理南安縣印務將徵完康熙五十九六十年地丁錢糧內共截出銀五千四百兩侵欺入已並將流串日報拆封簿燒毀無存捏造民欠流交後任已據陳新具有甘結并稱時惟豫曾差人賄囑不令供出等情知府張無咎以縣審並不加具切看一面駁審一面轉報前來臣查南安縣民欠錢糧既

據經承陳新供有時惟豫侵蝕情弊是否確實必
須質審方可定案隨嚴檄該府作速審解并將理
事同知時惟豫揭報督撫立請

題叅解任質審外事關官吏侵欺錢糧臣謹據實奏
聞伏祈

皇上睿鑒謹

奏

不特此案一切案件總同欽差秉公辦理可也

雍正五年七月初八日署理福建巡撫印務布政使臣沈廷正謹

奏為奏

聞事竊照閩海關稅務經前署撫臣毛文銓

題委泉州府知府張無咎管理徵收今張無咎因將厦防廳未買倉穀捏報實貯經臣會疏

題叅在案所有閩海關稅務亟需賢員料理臣查鹽驛道陳豫朋老成練達辦事勤慎堪以接管稅務

除現在委令該道前往暫行管理并確查從前徵
解稅銀數目俟該道呈報接印日期到臣臣即照
例

題明請

旨遵行外謹繕摺奏

聞伏祈

睿鑒謹

奏

好海關稅務可謂委署得人

同日又

奏為奏

聞事竊閩省察盤倉穀一案臣已據實分析造冊詳送督撫在案祇緣各屬所出倉收印結恐有欺朦情弊臣於造冊後隨詳明覆加盤查茲據前署泉州府廈防同知事汀州府同知李暉詳稱廈防廳倉有流交并碾米給兵共未買穀二萬七百餘石止

存價銀係知府張無咎報買足數寫書囑令捏出
倉收又李暉將運厦平糶浙米二千餘石抵給兵
米捏作倉穀碾米放給等情自行檢舉前來臣隨
將知府張無咎同知李暉會疏

題叅外伏查閩省倉穀前因知府胡承謀結連同寅
屬員覬覦江浙平糶米穀彌縫買補那掩捏報洵
為罪魁仰蒙

皇上聖明洞燭將胡承謀革職進京之後一切弊端漸

已顯露將來各府縣中如廈防廳之捏出倉收謊報實貯者更不知凡幾矣除現在逐一再行嚴加確查外謹繕摺奏

聞伏祈

睿鑒謹

奏

所奏知道了朕今簡命楊文乾等來閩諒伊等到時自將一一清楚也

雍正五年十月初三日福建布政使臣沈廷正謹
奏為恭繳

硃批事竊臣前將捏報倉穀失水及耗羨補完虧空并
冒邀議敘等案各緣由繕摺奏

聞茲蒙

皇上將臣原摺發回奉到

硃批臣跪誦之下仰見我

皇上天地為懷大公至正凡在

覆載之中共切

生成之戴臣遵將諸凡弊端於

欽差到閩之時已一一備悉明白造冊分送在案今廣

東撫臣楊文乾會同撫臣常賚將閩省府廳州縣
各員缺盡委

命往人員署理盤查總期徹底澄清務使水落石出如
有假捏不實貯在倉者臣立即據實揭報聽候

題叅斷不敢一毫徇隱上負

隆恩所有奉到

硃批理合恭繳謹

奏

從來天下事以得中為貴但能屏去一私自無不當之
理若恐累及己身而過於從事名為公舉仍屬私心惟
相機合宜只求益於國計民生而為之則雖私亦公也
是非當否全在公私二字即

上蒼之錫福降災亦各因公私而譴祐也可不慎歟凡人

解悟此理者少勉為之

同日又

奏為恭謝

天恩事本年八月十二日

欽差廣東巡撫臣楊文乾到閩傳

旨沈廷正此番辦事如果盡心竭力朕必用伊為別省
巡撫若少有徇隱瞻顧朕決不輕恕欽此臣跪聆之
下不勝感激悚惶伏念臣蒙

聖主養任之恩至深至厚縱竭盡駑駘力圖報效亦不能仰答

高深於萬一又何敢少存狗彘瞻顧之念自蹈欺君負國之罪惟是心切報

主不避怨嫌每致事多掣肘正際孤立寡援之候特邀聖恩畀臣署理巡撫印務復

遣重臣來閩清查倉庫俾臣職守應為之事欲言未遂之志得以稍盡心力仰見

聖主憫臣孤立格外

矜全從此戴高履厚之年皆犬馬圖報之日矣所有

欽差臣楊文乾來閩會同撫臣常賚辦理事宜就臣見

知者謹陳其槩如閩省府廳州縣有倉庫關係者
其已叅及出差離任等缺經督撫委署在先酌量
現署之人如係來閩人員甫經署事現在交盤者
俱不更換外其有雖係來閩人員署理但為日已
久又經出結者惟恐從前或有逼勒扶同之弊即

將現到候補人員改署查其虛實再有於倉穀案

內已叅聽候部議未離任之員及雖無倉穀罣礙

在任年久各官交錯調換委候補人員分往署事

盤查以倉庫之虧足定本官之去留更將委往之

員又斟酌地方之繁簡試看才具之短長因地制

宜隨材器使復令臣將通省各項倉穀及歷年未

完正雜錢糧江浙運閩米穀糶賣價銀各數按項

造冊徹底清理又念漳泉二府為財賦重地令郎

中鄂彌達往漳州府員外郎伊拉齊往泉州府親
身察盤俱於八月二十八日自省起程矣合併陳

明緣臣奉到

聖訓謹此繕摺恭謝

天恩謹

奏

如是辨理甚好仍須加勉自勵庶無放恣之失

同日又

奏為奏

聞事竊查閩省自八月初二日得雨以後雨水稀少臣
恐有妨田禾遍行各屬確查情形及體訪老農俱
云雨水雖然不足幸露重不患乾燥惟漳州府屬
之詔安縣雨澤愆期將來收成不無稍歉再汀州
府屬之永定縣夏被水災經臣詳報撫臣具

題在案今雖勘不成災但恐被水人戶寒冬無以資
生又詳明督臣委員往永定被災之處查明乏食

窮民或銀或米酌量撫恤俾免失所至臺灣府屬之彰化縣夏間偶遭風患嗣據報稱亦無傷損田禾前九月二十七八兩日省城連得大雨四野霑足閩省田地依山傍海高低不一是以收割亦有遲早不同約計分數福興延建汀邵六府俱有八九分及七八分不等泉州二府約有六七分及五六分不等臺灣府屬禾苗現在結實亦約有八九分不等福寧州屬亦俱有六七分不等再查福興

泉漳四府地瓜番薯俱已成熟是統計閩省本年
早晚二禾收成雖不獲盡登大有但較之歷年以
來似又不可多得者矣臣謹繕摺奏

聞上慰

聖懷謹

奏

覽收成分數朕懷深慰

雍正五年十二月二十五日福建布政使臣沈廷

正謹

奏為恭繳

硃批仰祈

睿鑒事竊臣齎摺人回捧到臣奏捏報失水等事一摺

奉有

硃批臣跪讀之下仰見我

皇上天地為懷仁慈普被凡在化育之中無不提撕警

覺格外生成似臣之愚昧若不蒙

聖明照鑒洞徹隱微臣雖行之終身而不自知其非今
自奉

聖諭之後不覺心地豁然辦事循循有序朝夕每捧誦
硃批字字箴規實可

垂訓萬世臣具有人心敢不敬遵益加勉勵屏去私心
恪秉一公以仰副

皇上教訓成全之盛心於萬一所有奉到

硃批理合恭繳謹

奏

訓諭雖由於朕確信與否力行與否則在爾也不但朕不能強即爾自身亦看福量何如耳辨別公私二字甚難莫看作易事勉之勉之

同日又

奏為據實奏

聞事竊查來閩候補知縣管景濂題授侯官縣旋即丁

憂離任奉

欽差委往福清縣清查舊欠錢糧遲延不覆經

欽差檄行申飭管景濂即拘承催之保長責比衆人即

匿名貼揭又以管景濂帶往侯官縣書辦蔣秀門

子楊貴需索銀錢一時逞刁即將管景濂坐轎毀

碎管景濂亦以福清縣糧房李信等侵糧弊露唆

使所致具稟通報臣一面轉詳即據詳提犯續將

先到案人犯嚴審據李信等供認指使毀轎不諱

質訊侯官縣書辦蔣秀門子楊貴俱供認得有福

清縣各糧房銀錢等語臣即將審過情由通詳

欽差暨督撫二臣併聲明提到餘犯另審在案又訪聞

學臣程元章考試漳郡正在看箭之時人多擁擠
守役執鞭驅逐悞及武生與考生童及觀看閒人
輒以辱及斯文羣起擲石誼譁學臣即將本役薄
責隨即停考務拏出首犯懲儆然後考試後因衆
生童懇求情切復行考試仍嚴拏為首棍徒適署
漳州府知府潘體豐在省臣即諄囑確查為首之

人嚴拏懲究嗣奉督撫准學臣來咨行臣轉飭查
拏臣復飛檄催提外理合繕摺奏

聞謹

奏

此二事於汝奏未到以前朕業已聞之矣

同日又

奏為恭謝

天恩仰祈

睿鑒事竊臣前將

欽差初到閩省所行盤查倉儲事宜約畧具摺奏

聞今臣齎摺人回奉到

硃批仰見

聖主教訓成全有加無已臣敢不敬遵

諭旨小心謹慎益加勉勵茲通省府廳州縣倉庫俱委
現署之員徹底盤查如錢糧內有虧空那移官侵
吏蝕及虛開民欠者經臣陸續通詳

欽差臣楊文乾等會同撫臣常賚

題叅仍勒限完補內有續完者即詳題開復至奉
旨發審之耿國祚等各案臣謹遵

聖訓小心謹密會同按察使喬學尹秉公審理逐案詳
解

欽差會題在案其一切案情不敢重複瀆陳外惟有通
省倉穀臣分別官民捐積監穀將從前額數及叅
後買補并現存價值者條分縷析備造清冊詳題

內有虧缺霉爛者另詳叅追現存之穀臣面稟

欽差徹底盤查以穀一石碾米五斗足數者照額盤收
倘不足五斗及有盤少者照缺少之數合算賠補
至於存庫穀價有多寡之不同地方有產穀不產
穀之分臣悉心斟酌揆度情形除興化府已買補
不議外所有福泉汀漳四府素非產米之區應委
官齎價協同原經手之員往隣省豐收地方購買
其延建邵三府并福寧州各於本地採買惟福寧

州恐一時買不足數亦令隣省購買其往外處採
買者定限六箇月運回收貯其本地採買者照穀
數之多寡定買補之限期多者限以三箇月為止
俱令現任官督同原經手之員依限買補如逾限
將督買與經手之官叅處其腳價不敷之處經
欽差會同撫臣常賚行令原任巡撫毛文銓賠補俱現
在通行各官遵照從此通省之積弊頓除千載之
規模永定若非我

皇上睿慮周詳委用人安得官不煩而民不擾八閩
之倉庫充裕海疆之兵民俱有攸賴也臣愚無知
躬逢

盛世安享敕寧實切惶悚惟有殫心竭力永圖犬馬
之報已耳現在

欽差廣東撫臣楊文乾於本年十二月二十一日赴廣
浙江觀風整俗使臣許容吏部郎中臣鄂彌達亦
於同日起程矣至貢外郎臣伊拉齊撫臣楊文乾

傳

旨補授福建鹽驛道合併繕摺奏

聞伏祈

皇上睿鑒謹

奏

欣悅覽之朕顧慮閩疆之念少釋矣

雍正六年正月初八日福建布政使補授貴州巡

撫臣沈廷正謹

奏為恭謝

天恩仰請

陛見以抒下情事竊臣於雍正六年正月初六日奉督撫二臣准吏部咨文內開奉

上諭何世璠到京另有用處貴州巡撫負缺著沈廷正補授等因欽此轉行到臣臣聞

命自天感激無地隨恭設香案望

闕叩頭謝

恩第念臣智識短淺閩藩兩載未效涓埃幸蒙

皇上聖訓頻頒是以得免隕越今復荷

皇上天恩畀臣貴州巡撫任愈重而懼愈深感悚之忱

實難言喻若不趨赴

闕不必來京廷面聆

訓旨恐黔省苗獠雜處一切地方事務無所遵循輾轉

思維孺慕益甚臣擬於交代清楚之日即星馳就

道在江西湖廣適中地方恭候

恩旨伏乞

皇上憐臣愚昧犬馬戀

主出於至誠

准臣入京

陛見躬承

聖訓親授方畧庶邊疆緊要之區措施不致失宜矣謹

此繕摺奏

聞臣曷勝激切待

命之至謹

奏

爾今往撫黔省較之閩藩之任尚易諸凡諮詢鄂爾泰而行可也此人心地非如高其倬一流但知自顧而不顧人實乃當代偉器為古名臣中之罕見者爾到任後自知爾為藩司時朕不惜諄諄訓誨茲任巡撫表率通省寧不更重然朕一無所諭惟與鄂爾泰同心協力誠信相孚斷不至有損於爾一切地方事務請訓於朕不

如就正於伊封疆之責最要者惟察吏一著不宜故立異同凡有所見與伊詳悉商酌辦理諒必無差謬果能謹遵朕旨實心奉行保爾為平安悠久一好撫臣也如交代已竣速赴新任毋遲

同日又

奏為奏

聞事竊查閩省去歲秋冬收成分數雨水情形經臣繕

摺具

奏俱蒙

聖鑒今歲新春訪查米糧價值米有上中下不等故價
亦有多寡不同福興二府屬每石一兩二錢及一
兩三四錢不等泉汀漳三府屬每石一兩三四錢
及一兩五六錢不等延建邵三府屬每石八九錢
及一兩一錢餘分不等臺灣府屬每石一兩餘分
及一兩一二錢不等福寧州屬每石九錢餘分及
一兩有零不等通省米價頗平百姓俱各安居樂

業麥苗現在秀發理合繕摺奏

聞謹

奏

據奏閩省米價尚未見甚平

雍正六年四月初二日貴州巡撫臣沈廷正謹

奏為恭謝

天恩事本年四月初二日臣於延平府地方據臣齎摺

人回捧到臣前奏懇請

陛見一摺奉有

硃批臣跪誦

諭旨諄諄開導不啻面對

天顏親聆

提命敢不銘心鑄骨字字恪遵實力奉行以仰副我

皇上隆恩異數有加無已之盛心至貴州地方情形屬

吏賢否與夫興革撫綏事宜容臣到任留心察訪

凡有關於庫帑積儲吏治民生者臣惟仰遵

聖諭一秉至公諮訪督臣鄂爾泰詳悉商酌辦理斷不
敢故立異同偏執已見致負

國恩除臣起程日期已另行奏

聞外理合繕摺奏謝

天恩并繳

硃批謹

奏

朕意不但諮訪事宜而已當竭力效法其居心為要勉

之

同日又

奏為恭繳

硃批仰祈

睿鑒事竊臣於雍正五年十二月二十五日將
欽差清查倉庫明白緣由具摺奏謝

天恩奉有

硃批又將漳郡武童不法罷考及候補知縣管景濂奉

委福清縣清查民欠被百姓毀轎各情由具摺奏
聞奉有

硃批又將原奉

硃批具摺恭繳奉有

硃批臣俱敬謹跪領伏念臣碌碌庸材坐糜廩祿揣分

難安夙夜思維何莫非

聖主洪恩澤及微臣敢不敬凜

訓諭竭盡駑駘勉報效於萬一所有奉到

硃批三摺理合恭繳謹

奏

天志報效固好但須實力行之恪秉一誠無欺無隱為
要

雍正六年七月十六日貴州巡撫臣沈廷正謹
奏為奏

聞事竊臣蒙

皇上天恩陞授貴州巡撫於本年六月初八日到任業

經恭疏

題報在案臣到任時署撫臣祖秉圭至臣署將籌畫
糶借倉糧並嚴禁地方官於秋收後派發民間買
送米穀一事向臣說知臣自入境之時即訪聞黔
省各府州縣去歲平糶倉糧減價太多以致秋成
官民買補維艱又聞糶賣倉糧時本官多有不親
自赴倉查察惟委佐雜官監糶以致豪棍衙蠹人
等各捏戶名一齊赴倉爭先糶買窮民終日守候

不得顆粒到手及糶買時又被府州縣親戚家人
勾同書辦將戥頭斗面任意高下暗中取利百弊
叢生臣到任後隨行文嚴飭司道府州縣各官力
除積弊如敢仍蹈前轍臣即會疏

題叅究處倘各屬果能親身監糶不致欺隱秋成斷
無不敷買補之理所有派發民間買送之弊臣自
當嚴行禁革至借給倉糧在祖秉圭謂糶不如借
臣愚以為糶糧尚有價銀存庫而借糧多係豪衿

地棍串通姦胥猾吏為之倡議引誘一二窮民列
入呈首向州縣借領雖有領狀保人多有假名假
姓難以憑信或秋收稍薄或經手官陞遷事故遂
藉口延挨虛懸倉儲故青黃不接之時只宜平糶
不可輕易借給若地方實係歉收窮民嗷嗷待哺
無力糶買倉糧又應仰體

皇仁一面酌量照例借給一面繕摺奏

聞此係暫時權宜非可定例與平糶並行臣管窺愚見

未知當否伏候

皇上訓示遵行謹

奏

覽借糶二議汝所見是祖秉圭原係庸平人也

同日又

奏為奏

聞事竊黔省地方自五月下旬以來雨澤愆期在得水
低田並無妨礙而高田灌溉難施未免亢旱臣到

任後率同司道文武各官齋沐設壇竭誠祈雨齊
赴

福黔潤澤龍神廟行香并通飭各屬一體虔禱又聞
米價稍長前署撫臣祖秉圭雖經檄令各屬開倉
平糶止有省城府倉糶賣其餘多有未曾開糶臣
恐貧民乏食復又行文飛飭平糶以廣

皇仁幸於六月十三四及十七八等日各府州縣并離
省數十里地方俱得雨澤嗣於二十三四等日及

七月初一初五初十至十一二三等日連沛甘霖
自省城以至離省數百里地方盡皆霑足其離省
寫遠之處雖未報到但密雲四布雨澤自必普被
臣於七月十六日親赴四郊驗看雨水禾苗情形
細詢農民據云黔省坑落老田名為爛田又名濕
田今逢久曠此時又得透雨禾苗比往年更加暢
茂將來秋收必有十分其低平田畝現在雨水充
足禾苗亦盛定獲豐收惟新墾山上高田名為乾

田率多沙石是以未得雨之前禾苗半帶黃色不能滋長兼有枯色者自得透雨之後禾苗盡轉青色驟長吐穗將來六七分收成可望其雜糧更加茂盛百姓衆口同聲云黔省總以老田收穫為主今歲統高下合算必有八九分收成等語惟黔西州從前所報雨澤比他處微小所以收成稍薄臣謹據實奏

聞謹

奏

覽得雨情形朕懷深慰

同日又

奏為奏請

聖裁事竊照黔省苗獠雜處良頑不一恭逢

皇上德威廣被聲教覃敷凡各路生苗陸續向化惟黎

平鎮遠平越都勻等府與楚粵接壤一帶生苗每

有欺陵百姓干犯法紀而八萬古州九股生苗盤

踞深山道路不相通達聲息不相連貫經督臣鄂

爾泰特委按察使張廣泗前往化誨招撫清理疆

界臣到任後因張廣泗親赴苗疆盡心招撫所有

跟隨出力官兵必須時加賞賚即投順生苗亦應

賞給花紅銀牌斷不可少且張廣泗行營需費甚

多雖經督臣給過銀一千兩但恐不敷應用臣再

四思維現在司庫無項可動惟捐納項下所存七

分公費銀兩可以發給臣隨即寫書與督臣鄂爾

泰計議商酌嗣接鄂爾泰覆稱如有不繼聽臣酌
量料理等語伏查捐納項下公費銀兩臣未經
奏明何敢擅自撥動可否仰懇

皇上天恩將司庫存貯捐納公費銀內撥動一千兩以
五百兩為預備賞賚官兵苗民之用以五百兩給

張廣泗為行營盤費之需庶用度有資感沐

速行給與毋遲但為數尚少更應添給方是

皇恩於無既矣臣因撫苗要務起見不揣冒昧伏候

聖明批示遵行至官兵需用行糧臣已檄飭附近各府

州縣預備接濟在案現據張廣泗稟報八寨等處
投誠苗民共大小一百一十餘寨又就撫生苗共
大小四十五寨其地界週圍約計二百六七十
里俟編戶議糧造冊通報今即赴凱里會集料理
丹江一帶等情理合一併奏

聞謹

奏

覽

同日又

奏為奏

聞事竊查黔省軍田前經工部侍郎申大成條奏令頂種百姓每畝上納稅銀五錢許照民間一體買賣過割報明布政司給以契尾執照永為已業等因奉

旨行文欽遵經前撫臣轉行各屬飭令將作何清查之處詳報到日出示曉諭尚未具有詳覆臣到任後

隨嚴飭各屬作速查明軍田畝數并現在承種管業戶口姓名造冊詳報毋使隱匿遺漏又奉

旨收買黃銅器皿一案緣黔省民間多有使用紅銅器

收買黃銅

一事在滇黔二省

可以不必過嚴

權宜為之

是以收買寥寥

臣恐各屬奉

行不力隨行文通飭至部定價值原據直隸各省

不產銅鉛之處通為酌定今黔省出產倭鉛其價

甚賤又接壤雲南紅銅之價亦不甚高以紅銅倭鉛煎煉黃銅計算不及部價若不酌照時價恐有

射利之徒多攬倭鉛私行鑄造黃銅生熟器四交
官領價亦未可定黔省雖收買無幾但錢糧關係
不得不因地制宜臣隨檄行布政司查議在案俟
詳覆到日臣再為確核咨請部示又建造

先農壇廟置買耜田臣恐各屬從前或有草率辦理
虛冒錢糧之弊已行令布政司委員查勘至於忠
孝節義祠宇並未據各屬報有建造者豈黔省竟
無可表揚之人再如州縣額設民壯或有虛應故

事冒銷工食又從前各官侵蝕賞給老民銀兩或
尚有隱匿不首均未可定臣俱檄行布政司嚴查
在案更查黔省礦廠稅務等項絲毫關係

國課從前雖有專員管理並不委員稽察臣現在與
布政使鄂彌達細為籌畫清查謹此繕摺奏

聞伏祈

皇上睿鑒謹

奏

留心庶務甚好惟貴力行無倦

同日又

奏為據實奏明仰祈

睿鑒事竊查黔省從前地方官遇有命盜案件僅草率具文詳報上司而上司即據詳一批再催牌幾次嗣後任其沉擱即各屬有將正犯拏獲詳報者多照苗民犯法之例從寬外結竟不按限審擬具

題自前歲督臣鄂爾泰到任之後仰體

皇上慎重刑獄暴安良德意與前撫臣何世璠加意整頓凡苗民命盜案件不許外結各屬始知畏懼處分不敢諱匿但積案纍纍多未完結一時驟難清理容臣逐案確查俟查明幾案先行陸續具

題外再有從前實係命盜重案而首犯或久已在逃或久伏冥誅承審各官亦久已病故者或本非正盜正命原可無庸

題結者臣不敢冒昧具

題一面將輕案人犯酌量情罪發落一面將重案審擬具

題其自盡命案有情節可疑者臣務必細加根究不使其有絲毫疑竇然後具疏完結謹此繕摺奏

聞謹

奏

好竭力整頓務使陋習盡除刑法出入稍失其平則上干

天和不加詳慎敬謹可乎朕今調爾為滇撫黔省事務毋
因暫署而存諉却之心

雍正六年八月十二日署理貴州巡撫事務雲南
巡撫臣沈廷正謹

奏為恭謝

天恩事本年七月十七日准吏部咨開奉

上諭雲南巡撫員缺著貴州巡撫沈廷正調補欽此臣

恭設香案望

闕叩頭謝

恩嗣於二十五日復准到吏部咨開本年六月二十二日內閣交出奉

上諭據鄂爾泰奏稱黎平鎮遠等處一帶生苗近日聞風向化皆思內附現今委令張廣泗前往招撫等語張廣泗既有化誨生苗等事其貴州巡撫事務仍著沈廷正署理俟張廣泗到任後沈廷正再赴雲南新任欽此臣即叩頭謝

恩并備文飛檄新任撫臣張廣泗欽遵在案竊臣昨蒙
聖恩調補雲南巡撫自念才庸任重倍切冰兢隨具疏

恭謝

天恩茲復荷

皇上洪恩命臣署理黔撫印務

聖恩稠疊有加無已臣犬馬私衷感悚交集惟有矢竭
丹誠益勵精白以圖仰報

高深於萬一耳除另疏奏

謝外臣謹繕摺恭謝

天恩謹

奏

勉盡封疆職守以仰副朕委任之意可也

同日又

奏為恭謝

天恩事本年七月十六日准吏部咨開為欽奉

恩詔事雍正六年五月初六日題本月三十日奉

旨依議沈廷正著降一級從寬留任沈廷正任內處分之案甚多朕俱開恩寬宥者因伊前任福建布政使任內將通省錢糧倉穀未清之項徹底查明據實陳奏朕遣楊文乾許容等前往確查始將積年虧空盡行清理實係沈廷正陳奏之力朕彼時不將沈廷正之奏宣示於衆者因沈廷正現為閩省藩司恐清查之員有所瞻顧牽制且藩司專司通省錢糧凡各屬未清之項或有干涉沈廷正之處亦未可定今楊文

乾許容等將各項清查歸結沈廷正已陞黔撫而福建藩司任內並無絲毫未清之項實屬不徇情面實心辦事之員甚有功於閩省則朕屢次加恩寬免之由理應曉諭內外知之欽此移咨到臣隨恭設香案望

闕叩頭謝

恩竊臣一介庸愚仰蒙

皇上教育深恩數年以來凡臣前任內議處之案屢荷

聖慈寬宥雖肝腦塗地奚足上酬

高厚今臣又因前在陝西延安府知府任內失察甘泉
縣侵蝕老民銀兩一案部議照例降一級調用乃
蒙

皇上格外之恩以臣前在福建布政司任內曾將錢糧
倉穀查明據實陳奏

特沛殊恩將臣降一級從寬留任臣跪讀
恩旨不禁感愧無地是今日之官實

皇上再賜之官受

恩愈重圖報益難惟有倍加敬惕竭盡駑駘以期無負
聖主屢次矜全之大德於萬一耳除具疏奏

謝外臣謹繕摺恭謝

天恩謹

奏

勉之莫辜屢次擢用之恩莫辱今日特降之旨若稍隨
境遷移自問懷慚則常賚傳彙博爾多皆可為前車之

戒試思昔日受知於朕効力於朕處較伊等厚薄輕重相去若何不但臣子之誼當盡數十年培養之恩當報即以己身利害言之亦宜倍加誠敬期保克終倘或職任有玷致損朕之聲名顏面而欲希冀袒護私恩不可得也存諸內者竭力務一誠字復以鄂爾泰之居心行事奉為準則而效法之庶幾可矣

同日又

奏為奏

聞事竊照廣西西隆州八達寨土目顏光色等屢行不

法恃衆拒捕業經安籠鎮臣蔡成貴統領官兵於

本年七月二十二日起程赴粵會合攻勦在案臣

於八月初一日准安籠鎮臣蔡成貴咨稱七月二

十三日行至壩榜地方據遊擊賀成等報稱七月

二十一日職等率兵進勦已經攻到八達寨下詎

知粵西各路兵丁四山觀望不前賊兵圍繞以致

守備李文仲把總王承文并營兵二十六名土兵

此事

據督提

二臣俱經詳

悉奏聞

聞

十三名俱被傷身故千總索登貞陳思儀并營兵五十名土兵四名俱各帶傷等因移咨前來臣隨

一面咨會督臣鄂爾泰提臣楊天縱及廣西督撫

提鎮諸臣聽候遣撥官兵會合進勦一面檄委貴

西道王廷琬前往南籠督辦黔省官兵需用軍糧

並飭南籠知府協同料理在案臣思安籠鎮標下

遊守等官俱隨鎮臣蔡成貴出師八達而南籠郡

城地方緊要不可無弁員防禦即於臣標內派撥

馬兵六名步兵四十四名共五十名委千總王家猷於八月初四日起程前赴南籠府駐劄以資彈壓又查臣標左右兩營原額設馬步戰守兵丁一千五百名內奉文抽撥長寨兵丁一百二十名外撫臣張廣泗招撫生苗起程時帶去兵丁五百一十名臣撥往南籠府防禦兵丁五十名今撫臣張廣泗又調撥兵丁三百名左右兩營僅存兵丁五百二十名省會重地現在存兵無多臣再三籌畫

召募

之舉甚是此等係應月之項即宜動撥司庫備用

錢糧

以濟其事爾其相機酌量為之但召募止於百名

為數

尚少何妨多增數名耶於此奏未到之前朕已

有旨

諭湖南派調精練兵弁千名赴點聽候督提撥遣

笑

城地方亦可稍資防守茲督臣鄂爾泰提臣楊天

縱俱已派撥官兵攜帶大礮前往八達進勦而安

籠鎮臣蔡成貴亦咨報於八月初一日領兵前進

會勦理合繕摺奏

聞謹

奏

覽

同日又

奏為奏請展限盤查仰祈

睿鑒事竊照巡撫新任例應於三箇月內將各屬倉糧
盤查明白造冊保

題臣抵任之後即檄飭布政司糧道遊員詳委分路

盤查在案今查臣別案

題叅之護貴陽府事定番州知州葛敬夫竟將護府
任內平糶米價銀一千八百四十餘兩內虧空銀
六百四十餘兩又虧空府倉米七百五十餘石穀
三十石零又定番州任內僅平糶穀一千石價銀
四百五十兩虧空無存又虧空前在貴筑縣任內
倉米八百二十餘石臣現在一面繕疏續叅一面
通飭各屬將州縣平糶價銀解貯府庫將府倉平

糶價銀解貯道庫俟秋成照數預先飭發領回及時買補庶可杜侵那虧空之弊但通省地方遼濶以葛敬夫一人而論府州縣各任內俱有虧空由此而推則各屬倉糧果否實貯殊難憑信必須徹底盤查始能確知實數而徹底盤查又必須寬展限期臣不揣冒昧仰懇

皇上天恩俯照福建督臣高其倬新任盤查展限之例於正限外再

賜展限三箇月俾得徹底逐細盤查庶倉儲有賴而虧
空掩飾之弊俱立見矣除另疏

題請外臣謹繕摺具

奏伏祈

睿鑒謹

奏

若不徹底盤查何能杜絕掩飾之弊題到有旨但諸凡
事務亦不必過於苛刻

同日又

奏為奏

聞事竊照新任撫臣張廣泗招撫生苗一案臣於本年七月十六日已據張廣泗所報招撫過八寨等處生苗寨戶數目繕摺奏

聞茲於八月初四日准撫臣張廣泗移稱附近凱里之丹江一帶頑苗不遵化誨糾眾抗拒將情願向化各寨脅制不前七月二十四日行抵丹江枯桐隘

口頑苗等施放鎗礮官兵奮勇連克隘口六處至
二十五六七等日頑苗復來迎敵隨分遣官兵追
勦殺死頑苗數十人我兵奮勇用命受傷身故者
十一名但丹江共計百十餘寨地勢深險丁壯約
有數千所當亟請大兵始可應濟機宜請於撫標
內再撥官兵二三百名前來等因又張廣泗寄臣
書云丹江苗人藐橫無忌非官兵五六千名不克
濟用等語臣當即一面選撥撫標官兵一面檄飭

司道預備軍前應用糧石并調思南府知府吳穀
專司督運其輓運糧石及公文差使往來各路必
須安設臺站始免遲悞亦行文司道查議兼委署
貴陽府知府王玠協同平越營遊擊田玉前往查
勘料理又撫臣張廣泗需用盤費賞賚等項臣前

曾奏懇

爾之前摺業經批發矣如此權宜料理甚是張廣泗軍
皇上天恩動支司庫存貯捐納項下公費銀一千兩給
中如有所需當寬裕接濟俾不致拮据將朕此旨即行
發應用理應候

旨通知令伊源源檄取可也若公費不敷支用動撥正項導行何敢預期擅動緣此刻軍前必須用度不得不

應付一面摺奏以聞

仰體

聖衷權宜料理隨行文布政使鄂彌達動支銀一千兩

委員齎往撫臣張廣泗行營交收臣冒昧之罪伏

祈

聖鑒至一應情節臣俱備具咨文并寫書知會督臣鄂

爾泰提臣楊天縱聽候調度在案又於八月初六

日張廣泗差把總常富到省移稱丹江頑苗違梗

現在請調大兵所有一切需費為數頗繁請於司庫公項內撥銀一千兩備用統俟事竣造冊報銷等因臣即行文藩司照數支給把總常富領齋於八月初七日將選撥撫標馬步兵丁共三百名委左營守備徐希達右營把總楊漢飛管領起程馳赴軍前提臣楊天縱亦派撥官兵九百五員名委定廣協副將蘇大有帶領前赴軍前臣謹具摺奏聞再查辦理糧務必須委員專司其事今黔省各官多

有護署篆務不敷委用臣先已咨商督臣經督臣
鄂爾泰會疏

題請

候揀選得人陸續發往

簡發人員來黔委署補用在案如已揀選有人仰懇
皇上勅令星速來黔以便委用合併奏

聞上候

聖裁謹

奏

覽

雍正六年九月十三日署理貴州巡撫事務雲南
巡撫臣沈廷正謹

奏為恭謝

天恩事竊臣於本年八月二十六日接准河東督臣田
文鏡咨一件為誣盜屈命事內開准刑部咨會議
汝陽縣革職知縣繆之弼誣良致死褚乾一案等
因雍正六年六月十二日題十九日奉

旨依議沈廷正高文愷俱著照部議所降之級從寬留
任欽此移咨到臣臣即恭設香案望

闕叩頭謝

恩伏念臣一介庸愚才識短淺歷任以來屢有議處之
案捫心自問罪實難宥疊荷

聖主殊恩予以寬典不即罷斥

訓勵將來臣膺斯

異數方在夙夜惶恐寢食靡寧之際今又因臣前任河

南按察使任內失察之案部議降一級調用復奉
恩旨著照部議所降之級從寬留任臣跪讀之下感激
涕零不能自己臣惟有勉竭駑駘力圖報効以期
無負

高厚之恩於萬一耳除另疏奏

謝外謹繕摺恭謝

天恩謹

奏

於一切動靜云為處捫心自問仰首看

天不愧不怍行去自然皆是日前屢次訓旨甚明若少涉
恃恩肆志則朕諭殊為可惜耳其矢誠天公勉力為之

同日又

奏為奏

聞事竊查黔省山高土冷每年雨水過多所以老田收
成只有七八分光景今歲夏間晴霽日久而老田
收成詢之農民據稱竟有十分之外低田有八九

分收成至新墾山田亦有六七分收成惟安順府所屬州縣山勢更高沙石愈多是以山田收成較別府少減分數然低田仍屬豐收而老田亦與別府無異又威寧府屬之黔西州高低田畝合算亦有五六分收成查往年各屬山坡田地原比今歲收成畧厚但今歲老田大收通省約計實有九分收成較往年收成甚好現今各屬早稻業已登場晚稻飽滿結實其蕎麥等項雜糧俱皆茂盛目下

各屬米價每倉石八錢至一兩不等將來收穫完
畢自必更減茲據布政使鄂彌達查明詳報前來

臣謹據實奏

聞伏祈

睿鑒謹

奏

覽收成分數米糧價值深慰朕懷

同日又

奏為奏

聞事竊照廣西西隆州八達寨土目顏光色等抗拒情
形業經臣繕摺奏

聞並差人前往八達查探去後嗣據回稱安籠鎮臣蔡
成貴於八月初四日已抵八達隨有顏光色頭目
人等屢次到營求饒等語今於九月初九日臣接
准鎮臣蔡成貴咨報八月二十九日會合三省官
兵將八達蕩平得勝凱旋臣隨將從前派往南籠

府防禦撫標兵丁五十名行文撤回訖所有官兵
大捷緣由應聽督臣及提鎮二臣

題報外臣謹繕摺奏

聞再撫臣張廣泗招撫生苗一事各路官兵俱已到齊
張廣泗現在調集土兵先將八達布置然後再進
丹江合併

奏明謹

奏

據奏八達凱旋丹江招撫各情形朕懷深慰

同日又

奏為敬陳管見仰祈

睿鑒事竊臣抵任後查得黔省從前

命往人員俱已挨次用完現在府廳州縣多有懸缺待

人之處雖委員護署未免顧此失彼當即咨商督

臣鄂爾泰去後隨經督臣酌委滇省候補知縣黃

宗器試用知縣曹三善曹廷襄曾紀常林璵等五

員又試用知縣盧造一員赴黔暫行委用并會疏
具

題仰懇

皇上簡發人員來黔委署補用在案臣思府廳州縣員
缺固屬緊要而雜職官員有協理地方事務巡查
差遣之責亦不可一日缺少今查新選黔省雜職
人員多因路遙費難無力遠行或至中途逗留不
即赴任所以致員缺久曠臣愚以為嗣後貴州所

出雜職員缺在湖南廣西四川雲南附近省分應
選應補人員內按次銓補令其就近赴任較之遠
省銓補之員赴任甚為便捷但係臣管窺之見並
無成例可援未敢冒昧具

題是否可行伏候

聖裁謹

奏

朕將爾此摺發交部議據該部覆稱以為不可今將部

覆發來爾看諒必亦以為然也

所奏以縣丞通判用之劉復向一摺亦交部議俟覆到時另降諭旨

同日又

奏為奏

聞事竊臣據貴西道王廷琬詳揭署普安州事試用知縣王汝賢貪劣各款內開該州派撥民夫輓運軍糧縱令家人衙役等每米一石逐家派夫價銀三

兩六錢及該州雇夫運米每石實給腳價銀二兩三四錢不等其所餘價銀通同分肥又該州所運米石竟係米穀攬雜粗糲不堪以致漢兵不肯赴領押令土兵勉強支食又該州調赴軍前經營糧石起程時勒派舖戶夫馬價銀九兩五錢又該州額設驛馬除現在三十五匹多疲瘦不堪其餘十匹前經委員查勘俱係現覓充點等情前來臣查貴西道王廷琬詳內雖稱據南籠府知府黃世文

詳揭等語但黃世文並未通詳揭報亦未預先將王汝賢劣蹟備細稟知且所開濫派夫價舖戶等項又無受害人姓名可據其驛馬疲缺從前係委何員查驗因何不行詳報事關糾叅貪劣不得不查明證據是以隨批布政司會同按察司糧驛道移行貴西道南籠府細查確實并咨明督臣鄂爾泰在案俟該司等查報到日如果確鑿臣即會疏題叅外所有臣批查緣由理合繕摺奏

聞謹

奏

自當秉公確查必真知灼見後方議罰懲豈可令無辜者有冤抑耶

同日又

奏為奏

聞事竊照藩庫錢糧關係綦重故接受交代之時最宜詳慎今布政使鄂彌達為人倜儻言語明白但素

未做過外官到任以來未免諸凡疎畧不細加查
察其與前任革職藩司赫勝額交代冊結臣屢次
行催始據鄂彌達詳送前來臣於八月二十日親
赴布政司衙門率同在省各官將存庫錢糧按號
彈兌其元寶每百兩短少二錢散封每百兩有短
少三錢六七分不等者內中又偶有多一錢四五
分及三錢四五分不等者臣當即查問據鄂彌達
云昨接受交代時止照元寶數目查點接受並未

彈兌臣因司庫錢糧關係支放豈可輕重互異隨
回署繕文行令布政使鄂彌達將庫貯銀兩眼同
在省各官逐一較準以便復盤而鄂彌達與糧道
楊永斌當即親至臣署據鄂彌達云我一向做京
官實在不諳錢糧所以彈兌時輕重不一凡有短
少我自當照數補足遂取手本一箇向臣云這是
舊日盤查規矩臣云盤庫乃係公事餽送規禮斷
然使不得你如今身受

皇恩不該仍踵舊習凡有陋規湏悉行除去纔是鄂彌
達將手本收回深以臣言為是隨將錢糧彈兌補
足復詳請盤庫臣於二十九日又往盤查每封元
寶一箇餘皆小錠湊成一百兩彈兌足數現在將
盤明正項錢糧照例另疏具

題外臣聞得外面傳言云鄂彌達接受交代時為赫
勝額所愚得過赫勝額交盤禮四百餘兩故不將
錢糧彈兌遽行接受等語雖無證據而人言藉藉

臣不敢不為奏

聞又查黔省捐納一案鄂彌達所收銀兩惟聽庫官端木令儼及管捐書辦人等用民間使用貴平彈收每銀一百兩加平四兩到庫平上彈兌每一百兩實多銀三兩較從前藩司赫勝額署司趙宏本任內每貴平一百兩多收銀一兩凡捐納貢監生者庫官與書辦每名額外收使費銀六兩內分給布政使家人一兩二錢實有二兩之數餘銀瓜分如

捐納知縣每一員收使費銀二十四兩自黔省開
捐歷來如此交納迨鄂彌達到任有遠省鄉間人
交納捐銀者庫官等見其過於老實又多收使費
銀二三兩不等此等作弊庫官斷難一日姑容但

臣細思叅處庫官與鄂彌達遂有干礙且臣素蒙
聖訓凡屬員中或有小過苟可教導必須仰體

皇上愛惜人才至意多方勸勉以觀後效況藩司係
皇上擢用大員當

簡用之時甚費

聖心臣是以未敢冒昧將庫官端木令儼叅處謹將鄂
彌達不諳錢糧任聽庫官及書役蒙蔽作弊情由
據實繕摺奏

聞伏候

皇上睿裁批示再鄂彌達到任之後凡有錢糧項款不
明例限舛錯之處臣俱將始末原委備細說知總
期敬謹辦理俾無錯悞而鄂彌達一經明白當即

改正惟庫官端木令儼蒙蔽一事臣屢次向鄂彌
達諄切相告鄂彌達總云庫官為人老實回護其
非今臣不得不再為開誠說知如鄂彌達將庫官
詳揭臣即據揭叅處倘仍固執已見臣惟有恭候
諭旨遵行合併陳明謹

奏

鄂彌達才具原屬中平朕亦非有深知灼見而用也初
因伊本部堂官雖滿漢屢經易人未有不稱其優者及

差往閩省又能不辱朕命明白竣事回京復旨所以擢授今職爾其留心訪察如猶肯矢志向上砥礪操守止於不諳外任事體從茲虛心學習日久不難練達設存苟且不肖之心抑或自恃暨有懷私沽譽等疵即據實奏聞於朕類此者原係試用朕不執定成見於胸中也

同日又

奏為奏

聞事竊臣查得前任撫臣金世揚因黔省軍需公費借

動司庫錢糧不能彌補動帑收買水銀賣價補庫
一案經接任撫臣毛文銓

奏明將水銀存抵奉

旨令金世揚作速補完嗣又奉

諭旨著落金世揚之子同伊家人清楚等因欽遵在案

除前任布政使劉師恕申大成各任內賣過水銀
價銀歸補外尚有貯庫水銀五千三百三十五擔
抵銀一十五萬九千六百六十兩零經前署撫臣

石禮哈

題明將所存水銀分作兩次運赴廣東售賣已委普

安州知州洪奕隆赤畢營千總李士英押同金世

揚之子金昭運去水銀二千七百擔餘剩水銀二

千六百三十五擔現貯司庫臣到任後查運廣變

石禮

哈前於離任時已據奏過尚有些項未清云云朕

賣水銀迄今二載杳無音耗隨即專差赴廣咨查

料運廣之項定有著落

在案至於此項水銀當日係前任布政使裴粹度

詳請前撫臣金世揚動帑收買查原委前任普安

縣知縣姚應鶴普定縣知縣何經文及前任修文
縣知縣朱齊年等經手收買其水銀價銀連腳費
繩筐等項每擔僅十五兩五錢有零而抵作二十
九兩九錢存庫雖經部議賣不足數於金世揚之
子名下追完但其子金昭等果否力能完補無由
而知錢糧關係重大豈容以暗少之價值存抵庫
項之實數而從前歷任正署布政使劉師恕等於
交代之時惟據冊開水銀即作舊管內一十五萬

九千六百餘兩之錢糧遞相朦朧接受並不按照
彼時各官所買水銀之實價確核詳報以致暗虧
國帑歷久未清臣隨將暗虧緣由細向布政使鄂彌
達說知并行文飭查去後茲據鄂彌達查明通詳
臣現在會同督臣鄂爾泰會疏具

題伏候

皇上敕部議覆外臣謹據實奏

聞謹

奏

題明交部立案催追歸款亦屬當然朕謂此項錢糧歷
經有人擔荷諒必不至虛懸也

同日又

奏為奏

聞事竊臣聞得布政使鄂彌達家人蕭大路過鎮遠府
在貢生顏致明店內住歇即託致明買妾致明因
原任鎮遠營守備李應祥有一女未字現在擇親

遂暗施巧計將自己使女假作原任守備李應祥之女向蕭大說合經蕭大當面看中講定聘銀二百五十兩迨說成付銀之後被李應祥風聞此事欲行控告蕭大聞知此信遂向致明要退原聘不買此女致明輒令黨棍出言無狀將本省官長娶本省民女之語挾制蕭大而蕭大無可如何不敢索取原銀情願人財兩空旋即私回藩署臣思布政司家人在本地買妾固屬非理但顏致明竟敢

公然設計騙銀亦屬目無法紀此等棍徒斷不可容於地方臣現在密查顏致明素日有何惡款俟查明確實臣即據其惡款另案咨革嚴拏究處外謹此繕摺奏

聞謹

奏

此事必須兩罰方為平允若回護藩司家人而偏究顏致明斷乎不可將此諭亦令鄂彌達看

雍正六年十一月初六日署理貴州巡撫印務雲
南巡撫臣沈廷正謹

奏為奏

聞事竊照四川雷波土司楊明義助惡不法奉

旨擒勦一案臣接准部咨即一面飛咨督提二臣一面

委思州府知府劉洵護威寧府事大定州知州陳

嘉會等辦運軍糧該府等俱各上緊料理已將糧

石運送在案嗣緣軍務將竣所有叅將哈元生遊

擊卜萬年原領滇黔官兵在於川省交界堵截今
哈元生等奉文撤師於九月二十一起程至賊
黨阿驢地方忽遇阿驢部落蠻賊前來抵敵陣亡
千把總蘇世爵劉雄張應舉馬玉等四員兵丁三
十餘名臣接閱報文知官兵又須前往擒勦糧務
甚屬緊要隨飛咨督提二臣并差臣標千總執持
令箭馳赴威寧催運軍糧並探聽確情臣又思護
威寧府事知州陳嘉會現在專司糧務而威寧城

守營叅將楊馥亦領兵出師威寧一切地方事宜不可不加意料理是以委銅仁府知府姚謙前往威寧借督運之名令其體察民情凡有緊要之事協同辦理臣謹繕摺奏

聞謹

奏

爾等地方大吏猝聞意外事件最宜鎮靜以無事處之若稍驚惶失措不特自亂主見亦且搖惑兵民視聽所

關甚鉅至於奏朕原可不必矯情飾詞然亦以奏報詳
確氣度舒徐為貴觀爾殊屬褊狹不諳大體之甚朕非
訓爾作意欺隱也更勿錯會似爾無能小器非過則不
及奈何

同日又

奏為恭繳

硃批仰祈

睿鑒事竊臣前因奉

旨調補雲南巡撫復又

命臣署理黔撫事務繕摺奏謝

天恩奉有

硃批又奏請展限盤查各屬存貯倉糧緣由一摺奉有
硃批臣跪讀之下字字銘心鏤骨諸事務期準乎律例

合乎情理固不敢瞻徇廢弛以博寬厚之名亦不
敢分外吹求致有苛刻之處惟上遵

皇上至公至明無偏無倚之

聖訓敬謹辦理以圖報效於萬一耳所有原奉
硃批奏摺理合恭繳謹

奏

朕觀爾之才具即心有餘而尚恐力不足若復不矢志
勤恪倍加敬慎更當作何底止耶

同日又

奏為微臣恭蒙

聖訓慚感彌深謹具摺奏

謝敬繳

硃批事竊臣因在陝西延安府任內失察甘泉縣侵蝕
老民銀兩一案部議降一級調用仰蒙

天恩從寬留任臣隨繕摺奏謝今蒙

皇上硃批教訓令臣存諸內者竭力務一誠字復以鄂
爾泰之居心行事奉為準則而效法之臣跪讀

訓旨不啻躬聆

提命臣自問何人仰邀

聖主成全期望之深恩至於斯極感懼踧踖莫可名狀

惟有殫心竭力不敢自暴自棄諸凡倍加敬誠效

以爾

之材質效法鄂爾泰正所謂配極效顰也自信不

法督臣鄂爾泰之居心行事以圖上報

疑殊屬大言不慚

洪恩於萬一臣謹繕摺恭謝

天恩并繳

硃批原摺謹

奏

覽

同日又

奏為奏

聞事竊查黔省每年秋冬之間天多陰雨今歲九十兩月以來細雨連綿晴日甚少是以各屬地方雖獲豐收而正當收穫之時值此陰雨且本年平糶之米各屬上緊買補還倉故米價比前稍覺增長臣思倉糧固須速為買補而民食亦不可不仰體皇仁因時籌畫所有本年平糶米石各屬既在買補若

將歷年存價未買之糧一時並買勢必米價高昂
再四斟酌自宜將歷年未買糧石暫緩買補俾採
買既少米價自平適據布政司及糧驛道等具詳

展限買補前來臣隨據詳咨部在案但臣管窺之
是凡事俱相時合宜而行庶無膠固之失倉糧應如是
見未知是否伏候

暫緩買補也

聖明指訓至現今貴陽府省城米價每倉石一兩以至
一兩一錢三分不等其餘各屬米價每倉石八九
錢以至一兩三四錢不等昨於十月二十七八等

日天氣開霽自十一月初一日至初六日甚是晴
朗臣謹據實奏

聞謹

奏

覽

同日又

奏為據實奏明仰祈

睿鑒事竊臣接准吏部咨文內開將湖廣湖南廣西等

省保舉之貢生生員馮臣烈等帶領引

見奉

旨馮臣烈崔汜向志文吳士堯周京勲劉樵丁膺策陽
造極陳齊襄吳鳳林命往貴州交與該督撫以知縣
以下等官酌量委署試用魏琛著以訓導用欽此臣

查

命往人員內有陳齊襄係臣女壻今臣雖荷

聖恩調補雲南巡撫但現在署理貴州巡撫事務查翁

壻原無迴避之例而誼屬至親諸凡誠有未便伏懇

皇上格外洪恩將臣壻陳齊襄

命往別省委署試用令其効力則仰戴

天恩於無既矣臣謹繕摺具

奏伏祈

睿鑒謹

奏

黔撫印務爾係暫署所謂五日京兆耳乃故為避嫌之舉瑣瑣煩瀆殊屬不曉事之極

同日又

奏為奏

聞事竊臣准原署貴州撫臣祖秉圭咨稱秉圭在署巡撫任內奉有

御賜地理全圖大小十軸當即叩頭祇受嗣秉圭聞訃丁憂將地理全圖攜帶歸旗後始知降三級調用

又接閱邸抄奉

旨朕所賜各省督撫提鎮等地理全圖出自特恩如該督撫提鎮等有陞轉他省及予告回籍者許其攜帶前往其革職降調者不許帶回著留在本衙門交與接任之員與上諭等件一同敬謹收貯欽此所有

欽賜地理全圖理合專差家人齋送查收等因到臣臣

隨將齋到

欽賜地理全圖大小十軸恭設香案望

關叩頭查明與從前交代之

上諭等件一同敬謹收貯除繕疏

題明外謹具摺奏

聞謹

奏

似此既經具題事件何必又多一番瀆奏揆汝之心但求於已無過而已至於朕之煩勞毫無仰體之誠可謂庸愚無識之至

雍正六年十二月二十六日署理貴州巡撫事務
雲南巡撫臣沈廷正謹

奏為奏

聞事竊臣前蒙

皇上天恩命臣署貴州巡撫事務伏讀

上諭俟張廣泗到任後沈廷正再赴雲南新任欽此遵
奉在案今接撫臣張廣泗來書云丹江等處事務
既竣其上下九股俱經就撫即清水江一帶節據

鎮遠府稟報向化者已多惟黎平之古州一處雖
宣導在先現俱寧帖而地廣人衆猶須親身一往
布置但黎平窻遠非如凱里都勻之尚近省會兼
之丹江八寨諸凡善後圖維尤關緊要擬於正月
初間暫回省城再當星赴黎平等語臣思丹江生
苗業經就撫今撫臣張廣泗既定於正月初間旋
省俟屆期臣理宜欽導

諭旨將印信等項交代明白即赴雲南新任但張廣泗

又有到省後再赴黎平料理之說臣現在寫書請
教督臣鄂爾泰如督臣以臣必須送印起程臣俟
張廣泗到省即將印信等項及一切事宜交代明
白恭疏

題報前赴雲南新任如督臣別有商酌臣自當聽其
指教另摺奏

聞至督臣鄂爾泰為人正直公忠其居心行事悉皆報
國愛民無偏無私實為人臣之表式數月以來臣事

鄂爾泰亟當努力效法者其學問識見非一時勉強所能至其居心人皆可能但在肯奮勉與否耳汝等諸臣良多惟有朝夕黽勉效法其居心行事以圖報答皇恩於萬一耳臣謹繕摺具也

奏伏祈

睿鑒謹

奏

張廣泗既於黎平古州有尚須親往布置之處則爾自應仍留黔省署理以待事竣但督臣鄂爾泰又有來黔

與金鉞面議之事滇省亦不可無人滇黔二省或去或住之處與鄂爾泰熟商妥議而行可也

同日又

奏為奏請

聖裁事竊惟

龍神專司雨澤福

國佑民欽奉

諭旨令各省督撫迎請供奉本地虔誠展祀仰見

聖主愛民重農之至意前撫臣何世璠接到大學士富
寧安等寄書內開可於巡撫衙門相近擇吉方潔
淨之處建屋數間以為祠宇等語彼時因巡撫衙
門左近並無可以建祠之地適署前東南隅昔曾
建有明臣王守仁書院一所號為陽明書院遂興
工修葺改作

福黔潤澤龍神祠宇供奉虔祀將王守仁牌位另置
他所臣查王守仁謫為貴州龍場驛丞時著書立

說講明聖賢之學化民牖俗黔之人士無不被其
教澤咸知誦習詩書臣考之記載訪之輿論王守
仁實屬有功名教而陽明書院素為貴州省城士
子瞻仰誦讀之所今一旦改為

龍神祠宇勢必另為經營創構以臣愚見自應特建
龍神專祠始足以妥

神靈而昭誠敬臣前與司道等在於省城看有龍井
泉地方一處甚是潔淨且與巡撫衙門亦屬相近

約需工價銀三百餘兩即可於此處建造祠宇數
間供奉

龍神將此祠宇仍作陽明書院不特彰王守仁牖民
講學之功而衆士子亦得在內肄業一轉移間

神人胥悅莫不感戴

皇恩於無既矣是否可行伏候

聖裁批示謹

奏

此舉是當妥協之至前任所辦大錯矣且觀前此改作
或有私意存焉何也何世璠素乃留心理學儒臣伊等
皆各立門戶互相是非今以陽明書院改為龍神祠若
云無心之失何錯悞竟至於此然一切不必究論但俯
順輿情料理為是

同日又

奏為恭繳

硃批仰祈

睿鑒事竊臣前奏布政使鄂彌達初任外官不諳錢糧
一摺奉到

硃批臣遵查布政使鄂彌達先因諸事生疎偏執已見
迨臣屢次開誠相告而鄂彌達恍然明白已於九
月十八日將庫官等所得捐納陋規槩行革除勤
加稽察杜絕弊端近日辦理一切政務雖比從前
留心然尚多不諳凡與臣商酌者臣無不備細說
知務期情理允協不致錯悞倘從此果肯黽勉自

勵誠如

聖諭日久不難練達矣若鄂彌達不仰體

聖懷存私沽譽臣自當據實奏


聞不敢為之諱飾也所有原奉

硃批理合恭繳謹

奏

知過能改則無過矣果肯虛衷學習何事不可漸諳但當據實奏聞不必為之隱飾

硃批諭旨卷四十五上



總校官庶吉士臣侍朝

校對官編修臣莫瞻菴

謄錄監生臣楊可震